

**Peranan Relawan Tetap Relevan – Muhyiddin
Utusan Online
October 02, 2011**

PAGOH 1 Okt. - Timbalan Perdana Menteri, Tan Sri Muhyiddin Yassin berkata, peranan Ikatan Relawan Rakyat Malaysia (Rela) dalam menjaga keamanan dan kesejahteraan kawasan setempat masih relevan.

Beliau berkata, sumbangan Rela tidak boleh dinafikan khususnya dalam membendung sebarang ancaman musuh negara serta membantu Polis Diraja Malaysia (PDRM) mengatasi masalah jenayah.

"Pasukan Rela yang dahulunya dikenali sebagai Home Guard memainkan peranan amat berkesan sebagai benteng ketiga negara dalam menghadapi ancaman penganas komunis.

"Namun demikian, apabila negara bebas dari ancaman komunis, fungsinya tetap kekal untuk menjaga keamanan masyarakat setempat serta menjadi mata dan telinga kerajaan dalam menghadapi ancaman mana-mana pihak," katanya ketika berucap pada Majlis Perhimpunan anggota Rela Parlimen Pagoh di sini hari ini.

Pada majlis berkenaan, Muhyiddin turut mengumumkan peruntukan berjumlah RM125,000 kepada pasukan Rela Parlimen Pagoh bagi membeli peralatan baru terutamanya berkaitan bantuan bencana alam.

Selain itu Timbalan Perdana Menteri turut menyampaikan Anugerah Tokoh Warga Emas peringkat daerah Muar kepada enam warga emas daerah itu yang telah banyak berjasa.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1002&pub=Utusan_Malaysia&sec=Dalam_Negeri&pg=dn_01.htm